

Rut

Elimélec pjeyoga

¹⁻² Domer shäng kjlara ko Elimélec, boy ko Noemí,* wapga domerga do pjök ko Majlón, Quilión. Elimélec, e efrateo, Belén so. Belén kjokyo, e Judá tjëyoga kjokyo obi. Israel tjëyoga pjluvo lläm obi dbaryoshko ga pjli shrono ara kjok eshko. E kjishko ga Elimélec to jek öötong beno sök Moab kjokyo, ba pjeyoga li tjok.

³ Eshko ga Elimélec shinmotkonoe. Ba boy Noemí beno sök eshko, ba wapga do pjök tjok.

⁴ E irgo ga ba wapga orkwosmono walëga Moab so tjok, kjlara ko Orfa, kjlara ko Rut. Gueniyo öötong luyo sak kjwara (10) ga ⁵ Majlón, Quilión, e shinmotkono lok. Eni ga Noemí beno sök wa dret, lanma dret bakoe.

Rut, Noemí

⁶⁻⁷ Eshkoshko ga Israel tjëyoga kjimtara Jehovárë, ga pjli dbaryo li pjirae. Roy kura Noemíre eshko Moab kjokyo. E kjishko ga wotjlik to iröng Judá tjëyoga kjokyo obi, ba pjlaydoga do pjök li tjok le. Opshik kjok eshko dwayo kjwlëshko ga ⁸ tjlë ba kong lok ga «Pjäy nom jek iröng bomi mekëga shwoy. Tja, bor wapga, tjawa woydoromi, kjimtoromi ara. E kjishko ga rokér Jehová kong ga pjäy woyde, pjäy kjimte eni bakoe. ⁹ Pjäy kong

* ^{1:1-2} Hebreo tjlökwo Noemí, e wolësowa loklo.

lanma wlēya jek obi, pjāy ber löng wopjlú bomi ushko wlo» le. E irgo ga lō shira,† tja toe loklo.

Kuya lok ga slar tira llém, ¹⁰ ga tjelé ba kong ga «Llëme. Tjawa jek bop tjok, bop pjeyoga löng lishko» le.

¹¹ Gueniyo kuya ga tjelé ba kong lok ga «Toguëga, pjāy to iröng obi. ¿Pjāy jek bor tjok lëmi kjér llëno? Tja wapga orkwosmok bomi tjok wlo ame.

¹² Pjāy to iröng bomi ushko. Tja këguë anmoyõ, tja orkwosmok obi wlo. Tja kjwe orkwosmono eeri jā, ga wapga domerga weno tjeng bor kong jekdo kjwe ga ¹³ pjāy orkwosmok llém, äär jong epa äär këkboga dbaryo guing llëme. Pjāy jek bor tjok llëme. Llëye weno bomi kong li, e kjange. Gueniyo llëye weno bor kong li, e kjang anmoyõ, Jehová opyono shäng bor wloyo kjishko» le.

¹⁴ Kuya lok ga slatong jek obi. Eshko ga Orfa, ba ëm lō shira, ga briktong toe. Gueniyo Rutda jek pjä ba ëm li go, to rayara llëme. ¹⁵ Eshko ga Noemí tjelé ba kong ga «Bop kjlara kjwe ïzong. To jek iröng ba pjeyoga löng lishko. To ba sböpga baïya poshrëk iröng obi. Pja to ba tjok dey» le.

¹⁶ Kuya ga tjelé ba kong ga
«Pja yorkér woydë jlökoyo.

Tja ichëp bop rayë llëme.
Pja jek kjone ga
tja jek bop tjok eshko.
Pja äär sök kjone ga
tja äär sök bop tjok eshko.
Bop pjeyoga lëp li,
e ber bor pjeyoga bakoe.

† ^{1:9} Lō shik lanyo, e tak pjang Génesis 27.26 go.

Bop Sbö lëp li,
e ber bor Sbö bakoe.

¹⁷ Pja shinmotkë äär kjone ga
tja shinmotkë ber eshko bakoe.

Pja jnekoba kjone ga
tja jnekoba eshko bakoe.

Tja tjlë bop kong jlököyo ga
shji löng së obishko ga
pja äär kjone pogo ga pja rayér llëme.

Rokér Jehová kong ga
shäryoror eni llëm wleni ga
tja shdūya» le.

¹⁸ Íya Noemírë ga raye woydë Rutdë llëm ku-zong ga llëye lara ba kong ame. ¹⁹ Eni ga jek lok pjöyikong.

Öötong löng Belén kjokyo ga nopga shdöktong tjlë ara. Walëga eshko so tjlë lok eng kong ga «¿Kjwe Noemí llëmdo?» le lok eni.

²⁰ Kuya Noemírë ga tjlë ba kong lok ga «Tja kowëmi Noemí ame. Jehová, llëye shärye woydë li shärye ga pjlüe. Ga tja iara beno sök woydë ara. E kjishko ga tja kowëmi Mara† shara. ²¹ Tja opshino na dwayoshko ga llë pogo woydër li tjok. Gueniyo tja söra Jehovárë tek iröng or rorëe. Opyono shäng bor wloyo. ¿Eni ga tja kowëmi Noemí sorëro?» le.

²² Eni ga Noemí opshino tek Moab kjokyo dwayo ba pjlaydo Rut, Moab so li tjok. Öötong löng Belén kjokyoshko ga dwla bo kjrozlong dbaryo li soyëba löng kjwlëe.

† **1:20** Hebreo tjlökwo Mara, e kë ara loklo. Ba kong ga tjlë ga «Tja iara sök kë ara», e «Tja iara sök woydë ara» loklo.

2*Rut ëng wlëno Booz tjok*

¹ Domer shäng kjlara ko Booz, e Elimélec, Noemí lanma dëna li pjeyo. E dbur ara bakoe.

² Dbar kjwara ga Rut tjlé Noemí kong ga «Rokér bop kong ga tja ichos jek oba parkë dwla skok löng lishko. Eni ga ébo, tja iche kjwe dwla bo beno tjeng ba irgo li töng» le.

Kuya ga tjlé ba kong ga «Jölö, toguë» le. ³ Eni ga Rut jek öötong shäng dwla bo kjrëba löng li irgo. Shäng parkëshko li kjokyo sogo, e Booz, Elimélec li pjeyo.

⁴ Eshko ga Booz tek tjwe shäng Belén kjokyo dwayo ga tjlé ba parkagaga löng li kong ga «Miga. Pjäy kjimtaga ber Jehovárë» le.

Kuya lok ga tjlé ba kong ga «Kjobe. Pja kjimtaga ber Jehovárë bakoe» le.

⁵ Eshko ga tjlé ba parkagaga tjeng li kägäyo kong ga «¿Walë shäng kjwe ë pjeyo?»

⁶ «Kjwe Moab so. Walë to tek Noemí tjok Moab kjokyo dwayo li kjwe. ⁷ Kjok shröngto ga tjlé bor kong ga “Tja ichos dwla bo llë beno tjeng ba skogaga irgo li töng sira” le. Ga “Jölö” lér ba kong-shko ga jek parkë, ga beno shäng parkë kjweshko. Woshtono shäng eeri jä ukwang kjwe dorko» le ba kong.

⁸ Eshko ga Booz jek Rut zlong bäng, ga tjlé ba kong ga «Chiya, tja kuzong. Pja dwla bo töng shto oblë llëme. Pja ber shäng jüshko bor parkagaga walëga tjeng wle tjok. ⁹ Domerga to löng dwla bo skok tjeng li töngshko ga pja parkë jek ba irgo. Pja twe lok tjötö llëme loror bor parkagaga domerga

kong tjän. Ga pja wodogroshko ga di kjrëp di bapkwo dlina domergarë tjeng wle roy dwayo» le.

¹⁰ Kuya ga kjök tono, kjujono bokdo kjlay klung go, tjlē ga «Tja shto oblë so. ¿Bop bokso ga tja pjlüe lëp ega?»

¹¹ «Pja roy kuror uunkong. Bop lanma wolono tek'lékong ga bop èm, e kjimtëp shäng ara. Bop data, bop mekë, bop kjok, e rayorop pjir, ga pja to tek shrono beno sök nopga miydëp llëm löng li tjok. ¹² Jehová, e Israel tjëyo Sbö. Pja opyono beno sök ba sjägä dirko wleni, pja de wlo. Eni ga rokér ba kong ga pja potjwlëya, llëye shäryorop li kjishko» le ba kong.

¹³ Kuya ga tjlē ba kong ga «Woydér ga bop bokso ga tja pjlüe lëp ïyado. Bop tjlökwo, tja ie dbokjrë jek obi. Tja tjwlö llëm, bop parkagaga walëga tjeng wle dorko. Eni èmdë ga pja tjlē shäng bor kong yõtso, wlëpe» le.

¹⁴ Ga öötong iozlong dloyo goshko ga Rut rokara Boozdë, tjlē ba kong ga «Pja tegö. Pjlung shosho suk pjir wle kjros, ga pös kjillgwo bo dyo shpoä wle go, ga uozong» le. Kuya ga wloktëng sök parkagaga tjeng li tjrëko, ga kong dwla jnena tjeng li twara Boozdë ba kong kzwöböso. Eni ga kjrara, uara beno shäng bö tjung, wopjlu, ga beno obie.

¹⁵ E irgo ga jek dwla skok tjeng li töng obi, ga Booz tjlē ba parkagaga löng li kong ga «lëmi dwla töng kjone pogoshko, tõya töng tjeng dluw wleshko èmdë ga wëyë. ¹⁶ Dwla skomi, tömisshko ga lomi pjlöbö pjlöbö, tõya bomi irgo wlo. Ga kong llëye lëmi llëme» le.

¹⁷ Eni ga Rut dwla bo töno shäng kjok eshko äär jong kjok sënge. E irgo ga kjwokära bayo gök

kësbang tjung wleni kjwo sak kjwara (10).^{*} **18** E irgo ga söra jek u lok lishko, ga pina ba ëm kong. Dli twara ba kong llamo li shira, twara ba kong, ue wlo bakoe.

19 Ÿya ga tjlē ba kong ga «¿Eerishko ga pja dwla bo töng shäng kjone? ¿Pja parkë shäng kjone? Pja kjimtara kjok sogo lirë ara kjíshko ga rokér Jehová kong ga e kjimte ara bakoe» le.

Kuya ga tjlē ba kong ga «Tja parkono domer shäng kjlara ko Booz tjok» le.

20 Kuya ga tjlē ba kong ga «Eni ga rokér Jehová kong ga e kjimte. Jehová, shji nöpaga löng së obi li kjimte jlökoyo. Nöpaga wolono tjän li kjimte bakoe. Shji kjimte bi pjeyoga soshko tjeng lirë kjluwe. Ga bi pjeyoga kjlara jüni, e Booz» le.

21 Eshko ga tjlē ba ëm kong ga «Tja ichara ber shäng eshko, ba parkagaga walëga tjeng li tjok, äär dwla bo kjrozlong dbaryo pjitong guing» le.

22 Kuya ga tjlē ba kong ga «Toguë, pja ber shäng ba parkagaga walëga tjeng li tjok ga ber bop kong pjlüe. Pja jek shto oblë kjwe ga llëbo wen bop kong owa kjwe» le.

23 Eni ga Rut beno shäng parkë Booz parkagaga walëga tjeng li tjok, dwla bo kjrozlong dbaryo pjitong guing. Guenijo beno sök ba ëm shwoy.

3

Rut öör dwla kjwokäzlong shtoyo

1 Dbar kjwara ga Noemí tjlē Rut kong ga «Toguë, pja kong'lanma wlën kjlara, pja ber sök shtoyo pjlü

* **2:17** Gök kësbang tjung wleni kjwo sak kjwara (10), e bayo litro sak pjök (20) dik.

wlo. ² Booz, pja parkë shäng ba parkagaga walëga tjeng li tjok, e bi pjeyo. Kuzong. Eeri shkëyo ga to ba dwla kchwokäk. ³ Eni ga pja nom wë, pja poshtis poshtikklo lõ pjëlbël go, ga pja doyos shwong pjël wleniyo go. E irgo ga pja to parkë shäng lishko, gueniyo pja opping wëlë ba kong llém, äär iono, di iono pjir guing. ⁴ Eshko ga pë buk kjoneshko ga ïp yötso. E irgo ga pja jek ba zlong bäng, ba kjinyoklo dre lëkong li kjëp, ga pja opbuk buk eshko. Eshko ga llëye shäryëp wlo li'le bop kong» le.

⁵ Kuya ga tjlë ba kong ga «Llëye lëp bor kong li shäryér eni» le. ⁶ Eni ga opshino to jek eshko, ga llëye lara ba emdë ba kong kës li shäryara eni.

⁷ Ga Booz iono, di iono pjirshko ga beno shäng wopjลue. E irgo ga jek opbuno, pë buk dwla töng tjeng dluw li zlong bäng. Wop tjok ga Rut jek shäng wora wora, öötong shäng ba zlong bäng, ba kjinyoklo dre lëkong li kjara, ga opbuno buk eshko. ⁸ Kjok rong dik ga Booz buk li polläk, ga wolleno. Ga workwë jek kalékongshko ga kuya ga walë buk ba dre zlong bäng kjara, ⁹ ga tjlë ba kong ga «¿Pja éro?»

«Tja bop parkaga Rut. Tja kjimte bor pjeyoga soshko kjara jüni lirë kjluwe. Ga kjara jüni, e pja. Woydér ga pja orkwosmok bor tjok» le ba kong.

¹⁰ Kuya ga tjlë ba kong ga «Chiya, rokër Jehová kong ga pja kjimte. Domerga dwlas bor kjinmo tjeng ara. Kjone kjone dbur ara, kjone kjone song wleniyo. Wlénop kjara jüni kjwe, orkwosmok bop tjok wlo. Gueniyo shäryorop eni llëme. Tja bop lanma shinmotkono li pjeyo kjëshko ga pja opshäryono beno ba kong pjël, llëye shäryorop pjël ba

kong dënashko li kjinmo. ¹¹ Chiya, llëye bangkjrëp llëme. Llëye lëp bor kong li shäryér. Bor pjeyoga kjok ère so lönг kës li ommyidë ga pja walë wotjlik pjlü wlénijo.

¹² »Jlökoyo ga tja bop pjeyo soshko. Gueniyo domer shäng kjlara obi, bop pjeyo soshko anmoyö bor kjinmo. ¹³ Eeri shkëyo ga pja ber buk na. Bong kjok shröngto ga tja to lan ba tjok, pja dere, de pja de woydë llémde, e miydér wlo. Pja de woydë ga pja de. Gueniyo woyde llém ga lér bop kong jlökoyo Jehová ko go ga pja dér. Pja pos buk bop shtoshko kjwey äär jong bong kjok shröng guing. ¹⁴ Gueniyo pja öör buk na, woydér ga miydëba llëme» le.

Eni ga pono beno buk ba dre zlong bäng. Gueniyo wëshko kjok shröng, kjok sī obishko ga kojono, opshik ey dwayo wlo. ¹⁵ Eshko ga Booz tjlé ba kong ga «Bop kjinyoklo kjwe skwos, ga shas yõtso, roshko dwla iér wlo» le. Shäryara eni, ga dwla iara Boozdë kjringgwo tjer (6) söya wlo, ga toe.

¹⁶ Rut öötong shäng ba èm shwoy ga Noemí tjlé ba kong ga «Toguë, ¿pja öör sorë?» le.

Kuya ga llëye lara Boozdë ba kong li lara ba kong pjire. ¹⁷ Ga tjlé ba kong ga «Dwla ère twara bor kong, ga tjlé bor kong ga “Pja jek shäng iröng bop èm shwoy or rorë llëme” le bor kong eni» le.

¹⁸ Kuya ga tjlé ba kong ga «Toguë, koshos, llëye wen ïp wlo. Eeri ga domer li woshtë llém, llëbo li llgweya pjir guing» le.

4

Booz orkwosmono Rut tjok

¹ E wopro ga Booz jek öötong shäng kjok eshko opzrëzlong shtoyo, ga wlokteng sök eshko. Ga ūya wop tjok ga Rut pjeyo soshko lara li jek shäng eshko ga tjelē ba kong ga «Kjłara, pja tegö. Pja sirkes sök jūshko» le. Kuya ga jek sirkeno sök ba tjok. ² Eshko ga tjlapgaga rokara Boozdē doglo sak kzwara (10), tjelē ba kong lok ga «Pjāy tegö. Pjāy sirkek long jūshko» le. Kuya lok ga jek long sirkergö tjeng ba tjok bakoe. ³ Eshko ga tjelē domer li kong ga «Noemí tek shrono sök iröng Moab kjokyo dwayo, ga wotjlik sök kjok soynek. Kjok, e bi pjeyo Elimélec, ba lanma shinmotkono li ū. ⁴ Ba pjeyo soshko ammoyō li pja. E kjishko ga woydoror ga pja ommyidē, tjwlēp wlo. E tjwlēp jlōkoyo los tjlapgaga tjeng jūshko, tjlapgaga kjok llgwega wleniyo bokshto. Tjwlēp woydē ga tjwlēzong. Gueniyo tja ba pjeyo soshko bakoe. Pja bäm go, irgo tja. E kjishko ga tjwlēp woydē llēm ga los bor kong, miydér wlo» le.

Kuya ga tjelē ga «Enira tjwlēn» le.

⁵ Kuya ga tjelē ba kong ga «Kjok, e Noemí, Elimélec syāyo li ū. Ba wa shinmotkono li syāyo ko Rut, e Moab so. Kjok li ber Elimélec tjeyo tek ber ba irgo li ū ūyado wlo, ga tjwlēnopshko ga pja orkwosmok Rut tjok kjluwe» le.

⁶ Kuya ga tjelē ba kong ga «Enira kjok li tjwlēn llēm dey. Tjwlēnor ga kjok botoya jer bor shjiryo kjwe. Tjwlēn ga äe. E kjishko ga tjwlēs pjarë dey» le.

⁷ Eshko dbaryo ga Israel tjeyoga sdékwo tjok obi. Kjok llē soynek wlo ga ba soyneka, kjupkwo ioklo skwe kzwara, ga twe ba tjwlēga kong. Kjok soyneya, tjwlēya eni.

8 Eni ga domer li, kjupkwo ioklo skwara kjwara, ga twara Booz kong, tjlē ga «Kjok li tjwlēs pjarë» le.

9 Eshko ga Booz tjlē tjlapgaga löng li kong, noppa löng kës li kong ga «Eeri ga pjäy uunkong ber löng ba miydaga. Elimélec, Quilión, Majlón, e kjok kës li tjwlēnor Noemí kong. **10** Ga Majlón syāyo ko Rut, Moab so li kjroror beno sök bor boy, kjok li ber Majlón tjëyo tek ber ba irgo li ī īyado wlo, Majlón roy jer llém wlo bakoe. Pjäy uunkong ber ba miydaga» le.

11 Tjlapgaga löng li, noppa löng kës li, Booz tjlōkwo kuya lok ga tjlē ga «Jöö. Tjawa ber löng ba miydaga jlōkoyo. Ga rokérwa Jehová kong ga walē li kong wapga twe ara, twara Israel boyga Raquel, Lea kong sorë ga eni. Rokérwa ba kong obi ga efrateoga tjréko ga pja ie ber domer tjwlō ara wleniyo, ga Belén sopa tjréko ga pja ie ber roy kësbange. **12** Judá, Tamar, ba wa Fares kjishko ga ba tjëyo tek beno ba irgo li shdöktong träk llëme. Eni ga rokérwa Jehová kong ga wapga twe bomi kong li kjishko ga pjäy ie ber löng eni bakoe» le.

13 Eni ga Booz orkwosmono Rut tjok, ga pono ba tjok, ga beno shäng kjlaraso llém, kjimtara Jehovárë kjishko. E irgo ga wa buk kjlara domer.

14 Eshko ga walëga eshko so tjlē lok Noemí kong ga «Jehová poshrëy jlōkoyo! Eeri ga kjimtaga twara Jehovárë bop kong kjlara. Rokérwa Jehová kong ga chida li roy ie shdär Israel tjëyoga uunkong kong.

15 Pja woyde bop pjlaydorë ara. Bop kong ga tjwlō ara, wapga domerga doglo kjäk (7) kjinmo. Ga chida li weno ba kong. E kjishko ga pja ie ber mite wleni, ga pja këguëshko ga pja de» le.

¹⁶ Eshko ga chida li kjrara Noemírë ba wloshko,
ga kuna shäng ba tjok. ¹⁷ E koiara walëga eshko so
lirë Obed, ga tjlë lok ga «Noemí wa buk kjlara» le.
E irgo ga Obed, e wa Isaí. Isaí, e wa David.

David dataga, kjokëga

¹⁸ Fares tjëyo tek beno ba irgo li beno eni: Fares,
e wa Jezrón; ¹⁹ Jezrón, e wa Ram; Ram, e wa
Aminadab; ²⁰ Aminadab, e wa Naasón; Naasón, e
wa Salmón; ²¹ Salmón, e wa Booz; Booz, e wa Obed;
²² Obed, e wa Isaí; Isaí, e wa David.

**Sbō Tjlōkwo
New Testament and Shorter Old Testament in Teribe
(PM:tfr:Teribe)**

copyright © 2008 Wycliffe Bible Translators, Inc.

Language: Teribe

Translation by: Wycliffe Bible Translators, Inc.

Teribe [tfr], Panama

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Teribe

**© 2008, 2007, Wycliffe Bible Translators, Inc.
All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

539cf8e3-01bf-5f34-8833-610f18367f8c